

sunderghe memorien unde feste, dede naghemaket synd unde nerghen uppgesat en synd, alz de registre utwisit; de hebbe we tosamende gerekenet uppe sesseundertwintich punt; dar hebbe we togelecht unsis stichtis gud hima bescreven, alz to Werle¹³⁴ ses punt, to Wendessem¹³⁵ veer punt, van deme vorwerke to Ghetelde¹³⁶ viftehaff punt, to Watenstidde¹³⁷ driddehalff pund, to Hachem¹³⁸ unde Gilsem¹³⁹ ses punt unde to Drendalem¹⁴⁰ dree punt. Mit dusser vorbescrevenen gulde schal men unsen kor holden alze vorbescreven is to ghevende to alsodanen tiden en jewelk, alse sik dat geboret, beide memorien unde festa old unde nyge. Hir enboven synd de nygen memorien unde festa, de alrede uppe sunderich gud gesad synd; de scal men geven ok uppe de tid, alze sik dat gebord, unde en jewelk, alze me van deme gude hebben mach, dat dar to gelecht is. Wor aver in dusser vorscrevenen gulde gebrok worde, in welkem stucke dat gebrok worde, van orlegis edder anderer nod wegene, dar na scholde men gheven to den memorien edder festen, de sik dar to geboreden, alze dat vorderst reken kunde, unde enem iewelken na antale, also dat we unse kerken dar to myd vorderem borghe nicht beswaren en dorfften. Were aver, des god nicht en wille, dat unsis stichtis gulde menliken forboden worde van der herschap weghene to Brunswig edder van der stad Brunswig edder anderer also groter gewalt, dat we der nicht bruken en mochten to dussem vorscrevenen behove unde anderer nut unde nod unsir kerken bynnen dussen nabescrevenen iaren, alze dit gesat is, so scolde me de tid over alle dussen vorscrevenen stucke holden unde handelen na redeliker moghelcheit unsis stichtis unde alse unse heren dat capitul denne umme der nod willen sik vordroghen, de wile dat de nod warede. Wanner denne de nod affqueme, so scolde me dusse ordinacion io vordan holden de iar umme, alz de gesad synd to dren iaren, anstande des sondages na alle godis hilgen daghe negest to komende. Datum et actum anno domini millesimo trecentesimo nonagesimo in capitulo nostro generali feria secunda post dominicam Reminiscere continuato usque in feriam secundam post dominicam Iudica nostri capituli sub sigillo presentibus appenso in testimonium premissorum.

¹³⁴) Ührde-Warle.

¹³⁵) Wolfenbüttel-Wendessen.

¹³⁶) Braunschweig-Geitelde.

¹³⁷) Gevensleben-Watenstedt oder Salzgitter-Watenstedt.

¹³⁸) Evessen-Hachum.

¹³⁹) Evessen-Gilzum.

¹⁴⁰) Dahlum.